

GASTEIZKO UDALAREN GARDENTASUN KONTSEILUAREN IRIZPENA, GASTEIZKO UDALAREN GARDENTASUN-BETEBEHARREN BETETZE- MAILARI BURUZKOA. 2018KO EKITALDIA.

SARRERA

2019ko ekainaren 11n aurkeztu zitzaion Udalaren Gardentasun Kontseiluari Gardentasun eta Herritarrei laguntzeko Zerbitzuak egindako **“Vitoria-Gasteizko Udalaren Publizitate Aktiboari eta Informazio Publikoa Eskuratzeko betebeharrei buruzko txostena. 2018ko ekitaldia”**.

Araudi Organikoaren 87. artikulua honako eginkizun hau ematen dio aholku-organo horri: *“publizitate aktiboaren arloan eta informazio publikoa eskuratzeko eskubidea babesteari dagokionez Gasteizko Udalak dituen betebeharrak eta konpromisoak betetzen diren zaintzea”*.

Eginkizun hori betetze aldera, Araudi horretako 89. artikulua dio Kontseiluak Euskadiko Toki Erakundeei buruzko 2/2016 Legearen 66. artikuluan aipatzen den **“publizitate aktiboaren eta informazio publikorako sarbidearen inguruko betebeharren betetze-mailari buruzko txostenari irizpena eman”** beharko diola.

66. artikulua. Gardentasunari eta informazio publikorako sarbideari buruzko betetze-mailaren jarraipena

1.- Urte naturaleko lehen hiruhilekoan, txostena egingo da publikizitate aktiboaren eta informazio publikorako sarbidearen inguruko betebeharrak aurreko urte naturalean zein neurritan bete diren jakiteko.

2.- Txosten horrek ondorengo alderdi hauek aztertu eta azalduko ditu, gutxienez:

a) Udalak eta 47. artikuluan aipatutako bere menpeko gainerako subjektuek zein neurritan bete dituzten publikizitate aktiboko euren betebeharrak.

b) Gardentasunaren atarian kontsulta gehien izan dituzten edukiak.

c) Informazio publikorako sarbidea izateko eskubidearen erabilera: zenbat eskaera aurkeztu diren; zenbat eskaera ebatzi diren; batez beste zein epetan ebatzi diren; zenbat eskaera onetsi diren osoz, zenbat zati batean, eta zenbat beste pertsona bat aurka egonda; zenbat eskaera ezetsi diren, eta zenbat ez diren onartu; zati batean edo beste pertsona bat aurka egonda onesteko arrazoiak, ezestekoak, eta ez onartzekoak; maizen eskatutako informazioa; eta eskatzailearen profila (adintartea, sexua, eta eskaeran erabilitako hizkuntza).

3.- Egindako txostena publikizitate aktiboari dagokion informazio guztiarekin batera argitaratuko da.

Gardentasunaren Udal Kontseiluak txosten hori aztertu eta eztabaidatu du eta, ondorioz, irizpen hau ematea erabaki du.

IRIZPENA

Gardentasun-betebeharrak zenbateraino betetzen diren azaltzen da txostenean, bi alderdiri dagokienez; batetik, publizitate aktiboari dagokionez, eta bestetik, berriz, informazio publikorako sarbideari dagokionez. Bloke bakoitzean, galdatzen denaren arabera egituratzen da informazioa, eta egitura horri berari jarraitzen dio irizpen honek. Hobekuntza-proposamenak egiten dira atal bakoitzean, eta bideratutako jarduerak baloratzen. Nolanahi ere, ez dira gaiak banaka aztertzen, ezpada Kontseiluak zer edo zer esateko izan duen bloke bakoitzeko puntuak.

PUBLIZITATE AKTIBOA

1. PRINTZIPIO OROKORRAK

Gardentasun Kontseiluak modu positiboan baloratzen du bai udal aurrekontuari buruzko plataforma bai kontu-ematekoa inplementatu izana, eta orobat udal zerbitzuen katalogoa garatzeko egin den lana.

- **Herritarrei ematen zaien informazioa kalitatekoa, argia eta guztientzako irisgarria izateko beharrari buruz.**

Lehenago ere ohartarazi izan du Kontseiluak horren gainean —2017ko eta 2018ko txostenetan—, oinarritzat harturik batetik Gardentasun Legearen 5.5 artikulua, zeinen arabera gardentasunaren oinarritzako printzipioa baita informazio guztia ulergarria izatea, erraz eskuratzeko modukoa eta doakoa, eta desgaituentzat eskuragarri egotea bitarteko edo formatu egokien bidez, irisgarriak eta ulergarriak izan daitezzen, irisgarritasun unibertsalaren eta guztientzako diseinuaren printzipioari jarraiki, eta bestetik, berriz, Euskadiko Toki Erakundeei buruzko Legearen 50.5 artikulua, zeinek ezartzen baitu informazio horrek izan behar duela egiazkoa, erraz eskuratzeko modukoa, bereizkeriarik gabea, argia, erraza, zehatza eta herritarrek ulertzeko moduko mezuekin osatua, eta horretarako batez ere bideoak, grafikoak, argazkiak, marrazkiak eta ematen den informazioaren nondik norakoak

hobeto ulertzen lagunduko duen beste edozein konposizio-bide erabili beharko dela, orria edo dokumentu-euskarria osatzeko.

Komunikazio argiaren proiektua ari da garatzen arlo horretan; proiektu pilotu bati ekin zaio, Errolda Ataleko dokumentuak "itzultzeko".

Gizarte Kontseiluak balioespen positiboa egiten du abian jarritako proiektua dela eta. Hortaz, ez du gomendiorik ematen, esperientzia udal sail guztietara hedatzerik izango den itxaropena baitu.

2. LEGEAK EZARTZEN DITUEN BETEBEHARREN ANALISIA

1.- ERAKUNDEARI, ANTOLAMENDUARI ETA PLANGINTZARI BURUZKO INFORMAZIOA

3. puntua.- Organoen gai-zerrendak eta hartzen dituzten erabakiak.

Txostenean esaten denez, 2018ko martxoaz geroztik Udalak badu bideoakten sistema bat, zeinetara webgunearen bitartez sar baitaiteke. Nolanahi ere, jasota uzten da ez dagoela hitzen araberako bilaketarik egiterik. Horrenbestez, hau gomendatzen du Udalaren Gardentasun Kontseiluak, **bideoaktak direla eta:**

- **Sistema bat ezar dadila, bilkuren aktetan hitzen araberako bilaketak egiterik izan dadin, eta, hartara, akta horiek kontsultatzen dituenaren intereseko gaien inguruan udal talde politiko bakoitzak egindako adierazpenak eskuratzea errazagoa gerta dadin.**

6. puntua.- Antolamendu-egitura eguneratua.

Puntu honetan, aurreko irizpenetan egindako gomendio bera egiten du berriro ere Kontseiluak, **zuzendaritza-postuak betetzen dituzten pertsonen buruzko informazioaren publikotasun-betebeharrak direla eta:**

- **Udaleko zuzendaritza-lanpostuak edo erantzukizunekoak betetzen dituzten pertsonen ibildide profesionalari buruzko informazioa eman dadila, baita lanpostu horietan jardun ahal izateko beharrezkoa den profilari buruzkoa ere.**

11. puntua.- Udaleko alderdi politikoei buruzko informazioa.

Aurreko ekitaldietan bezala, baliabide publikoen erabileran gardentasun handiagoa lortzea posible litzatekeela atzematen da, eta proposamen bat egiten, nahiz eta indarrean dagoen legediak ez duen halako obligaziorik ezartzen.

Horrela, bada, gomendio hau egiten die Udalaren Gardentasun Kontseiluak **udal talde politiko guztiei:**

- **Argitara eman dezatela, ahal dela Udalaren webgunearen bitartez, Gasteizko Udalak egiten dien ekarpen ekonomikoaren berariazko kontabilitatea.**

Egia da, aurrekoetan adierazi izan denez, indarrean dagoen legediak ez dituela talde politikoak behartzen Udalaren ekarpenak zertarako erabiltzen dituzten publikoki eta aldian-aldian informatzera. Are gehiago, kontu horiek ez ditu Kontu-hartzaitza Nagusiak fiskalizatzen, salbu eta Udalbatzak zuzkidura horien berariazko kontabilitatea eskatzen badie. Nolanahi ere, diru-esleipen hori dirulaguntza gisa hartu behar den edo ez alde batera utzita, agerikoa da Udalak talde politikoei egiten dien diru-ekarpen hori udal-aurrekontuetatik ateratzen dela, eta, gainera, diru horren erabilerak baldintza batzuk bete behar dituela¹.

2.- GARRANTZI JURIDIKO-NORMATIBOKO INFORMAZIOA.

1. puntua.- Udal organoek hartutako erabakiak, zuzenbidea interpretatzen dutelarik edo ondorio juridikoak dituztelarik.

Aurreko urteetan ere gogora ekarri izan dugunez, maiz gertatu ohi da Udalean hartzen diren erabaki eta ebazpenek —hartzaile individual jakin bat izan ala ez izan— beste pertsona askorengan izan ohi dituztela ondorio juridikoak —edo herritar guztiengan—, nahiz

¹Hori guztia 19/2013 Legearen 6. artikulua eta 2/2016 Legearen 52. artikulua ildotik. Izan ere, horien arabera, besteak beste, udal talde politikoei buruzko informazioa eman beharra daukate udalek. Hain zuzen ere, Udalaren webgunean jasota dago udal talde politikoek jaso ohi dute diru-kopuruaren inguruko informazioa —bai talde bakoitzak hileroko jasotzen duen diru-kopurua, bai urteko batura—. Atal berean zehazten da, Toki Araubidearen Oinarrien Legearen 73.3 artikulua arabera, “kopuru hau inola ere ezin dela erabili korporazioaren zerbitzurako langileei ordaintzeko, ez eta ondare izaerako aktibo finkoak izan daitezkeen ondasunak eskuratzeko ere”. Halaber, txostenak dio, legearekin batera “Taldeen, ematen zaien diru-esleipenaren kontabilitate berezi bat eraman behar dute(la) eta udalbatzaren esku jarriko dute(la) Udalbatzak eskatzen dienean”.

eta pertsona horiek erabaki horietan berariaz aintzat hartuak ez izan. Gardentasunaren eta segurtasun juridikoaren printzipioek gomendatzen dute herritarrek oro ezagutu ahal izatea funtsezko erabaki horiek. Gai honetan, Kontseiluak gabezia nabarmen batzuk antzematen ditu. Esate baterako, Udalean dekretuak eta jarraibideak ematen direnean, ez dago zuzeneko bide bat Udalaren eta webguneko informazioa kudeatzen duen zerbitzuaren artean, erabaki horiek argitara emateko.

Txostenean adierazten da zehazteke dagoela udal organoek hartutako akordioak — zuzenbidea interpretatzen dutenak nahiz ondorio juridikoak dituztenak— identifikatzeko aukera emango lukeen irizpidea edo prozedura. Kontseiluko kideek uste dugu lan hori burutu beharra dagoela. Nolanahi ere, udal sailek eman dituzten eta argi eta garbi ondorio juridikoak dituzten hainbat jarraibide edo zirkularren berri izan dugularik, horien inguruan gomendio zehatzak emateko aukera beretzat gordetzen du Kontseiluak, Herritarren Parte-hartzearen Araudi Organikoaren 89.1.b) artikuluan xedatutakoaren ildotik.²

Hori gorabehera, gomendio hau egiten du Kontseilu honek:

- **Irizpideak finka daitezela, dekretu edo barne-jarraibide jakin batek herritarrentzat ondorioak izan ditzakeen erabaki ahal izateko, eta orobat identifikatzeko aplikatu beharreko araudia interpretatzera zuzendutako barne-akordioak, udal politika publikoak eskaintzeko moduan edo intentsitatean aldaketak eragin ditzaketenak, zerbitzu publikoak emateko moduari buruzko irizpideak aldatzen dituztenak, edozein udal zerbitzu edo prestazio eskuratzeko irizpideak arautu edo aldatzen dituztenak eta abar.**
- **Akordio, dekretu edota instrukzio hauek identifikatu ondoren, argitara eman daitezela.**

Bestetik, badira oraindik ere ondorio juridiko agerikoak izan ditzaketen zenbait erabaki argitara ematen ez direnak, hala nola Organo Ekonomiko Administrazioaren ebazpenak edo Udal Aholkularitza Juridikoaren txostenak. Kasu horretan, dokumentuak identifikatuta daude, eta, hortaz, lehengo gomendio bera egiten du Kontseiluak berriro ere:

- **Daudekeen datu pertsonalak kendu eta gero, Udalaren webgunean argitara eman daitezela Gasteizko Udaleko Organo Ekonomiko-Administratiboaren ebazpenak, eta batez ere aplikazio zabala izan lezakeen doktrina —kasu partikular horretatik haragokoa— ezartzen dutenak.**
- **Kontu-hartzailletza nagusiaren txostenak, edota Idazkaritza Nagusiarenak publikoak diren bezalaxe, argitara eman daitezela, baita Udal Aholkularitza Juridikoaren txostenak ere, hirugarrenengan ondorioak izan ditzaketen neurrian.**

3. puntua.- Arau-testuak egiteko dosierretako oroitidazki eta txostenak; bereziki, arau-eraginaren analisiari buruzko txostena.

Txostenean, beste behin ere, arau-eragina izan dezaketen oroitidazkien argitalpen potentziala berrikusi beharra dagoela esaten da.

Toki Araubidearen Oinarrien Legean ordenantzak eta araudiak onartzeari dagokionez ezartzen diren arauen haritik letorke dokumentazio hori ere argitara dadila galdatzea, eta orobat Administrazio Prozedura Erkidearen 39/2015 Legearen 127. artikuluan eta hurrengoetan araugintza dela eta jasotzen den erregulazio berriaren haritik. Eskakizun horren xedea litzateke, batetik, kontrolatu ahal izatea arauak onesteko orduan prozedura egokia jarraitu den, eta, bestetik, berriz, arau horiek araugintza onaren printzipioak betetzen dituzten ebaluatu ahal izatea, esan nahi baita: arauaren premia, efikazia, proportzionaltasuna, segurtasun juridikoa, gardentasuna eta eraginkortasuna.

Hori dena dela eta, Kontseiluak gomendatzen du:

- **Garrantzi juridikoko informazioaren atalean —behin-behineko onespena jaso duten arauekin eta indarrean dauden testuekin batera— argitara eman daitezela “*testu normatiboak egiteko dosierrak osatzen dituzten oroitidazki eta txostenak...*”**

²Gardentasunari, informazio publikoa eskuratzeko bideari eta gobernu onari buruzko abenduaren 9ko 19/2013 Legean eta Euskadiko Toki Erakundeei buruzko apirilaren 7ko 2/2016 Legean jasotzen diren

9. puntua.- Urteko Araugintza Plana, hurrengo urtean onesteko aurkeztuko diren erregelamendu-ekimenak jasotzen dituena.

Betetze-mailari buruzko txostenean esaten denez, Araugintza Plana aurkezteko aukera aztertu beharra dago berriro, eta —araudiari dagokion edukia eguneratzen jarraitzen bada ere— ekintza proaktiboren bat finkatu beharko litzateke, indarrean dauden arauen ebaluazioari zabalkundea emateko.

Beraz, gomendio hau egiten du Kontseiluak berriro ere:

- **Araugintza Plana argitara dadila, Gasteizko Udalaren webgunean edo.**
- **Indarrean dauden arauen ebaluazioaren zabalkunderako ekintza proaktiboak egin daitezela.**

3.- INFORMAZIO EKONOMIKOA, AURREKONTUEI BURUZKOA ETA ESTATISTIKOA.

1. puntua.- Kontratu guztiak, xedea adierazten delarik... Kontratuetan atzera egiteko eta kontratuari uko egiteko erabakiak ere argitaratu beharko dira.

4. puntua.- Kontratisten ez-betetzeengatik jarritako zigorrak.

Gardentasun Kontseiluak modu positiboan baloratzen du kontratuetan atzera egin nahiz uko egitearen inguruko informazioa —eta orobat kontratistei jarritako zigor eta isunen inguruko informazioa— zuzenean eskuratu ahal izateko sarbidea ezarri izana.

5. puntua.- Sinatutako hitzarmenen zerrenda, sinatzaileak, xedea, epea eta beste adierazten direlarik

6. puntua.- Sinatutako kudeaketa-gomendioak, xedea, aurrekontua, iraupena, betebeharrak eta beste adierazten direlarik

Txostenean onartzen da hitzarmenen edo kudeaketa-gomendioen testu osoak eskuragarri jartzea faltako litzatekeela, hirigintza-hitzarmenenak salbu. Horrenbestez, Kontseiluak berriro gomendatzen du:

betebeharrak hobeto betetzeko gomendioak egitea, dela ofizioz, dela edozein partikularrek eskatuta.

- **Txostenean esaten dena aintzat harturik, akordio horiei buruzko informazioa osorik argitara dadila, 2/2016 Legearen 55. artikulua 55. ildotik. Hain zuzen ere, egokia litzateke —datu pertsonalak nahiz babestu beharreko enpresa edo elkarten bestelako datuak salbu geratzen direlarik— hitzarmenen zerrendan estekak jartzea, hitzarmen edo kudeaketa-gomendioaren testu osora jo ahal izateko.**

7. puntua.- Emandako dirulaguntza eta laguntza publikoak: zenbatekoa, xedea edo helburua, eta onuradunak.

Esan beharra dago argitaratu dela informazio hori, eta balorazio positiboa egiten du Gardentasun Kontseiluak. Nolanahi ere, erreparatu diogu badirela izaera pertsonaleko zenbait datu, beharbada bereizi beharko liratekeenak. Zerbitzu eskudunari helarazi zaio, bada, kontu hori, berrius dezan.

14. puntua.- Zerbitzu publikoen betetze-maila eta kalitatea baloratzeko beharrezkoa den estatistika-informazioa

Betetze-mailari buruzko txostenean jasota dago webgunean eskuragarri egongo den udal zerbitzuen katalogo bat egiteko proiektuaren bitartez ari dela garatzen puntu hori, informazioa bildu eta sistematizatzeko lehen fasea bukatuta dagoela, eta katalogo horren euskarri izango den eta argitaratzeko aukera emango duen aplikazioa prestatzeko lanetan dihardutela gaur egun. Beraz, positiboa iruditzen zaigu 2018ko irizpenean jasotako eskaria —zerbitzuen katalogoa lantzeko lanekin aurrera egin zedila eskatzen baikenuen— betetzeko bidean egotea.

Era berean, aldeko iritzia agertu du Kontseiluak kontratu-zerrendak —baita gastu eta sarreraren dokumentuak ere— Open Data atarian gehitu direla eta, berrerabiltzeko moduko formatuetan gehitu ere. Era berean, positibotzat jotzen da <https://noradoaznirezergak.vitoria-gasteiz.org> ataria martxan jarri izana, udal aurrekontuei buruzko informazioa eskaintzen baita bertan, formatu grafikoan, herritarrei zuzenduta, erraz nabigatzeko moduko plataforma batean, eta datu ekonomikoak azaltzen, modu errazean.

16. puntua.- Ondare-ondasunen zerrenda, hala bere jabetzakoak direnena nola haien gaineko eskubide errealen bat dutenena, eta, hala bada, zein entitateri laqa zaizkion

Betetze-mailari buruzko txostenean adierazten da 2016ko datuak direla inbentarioan

jasota daudenak. Hori dela eta, gomendio hau egiten du Kontseiluak berriro ere:

- **Udal ondasunen inbentarioa eguneratu dadila.**

4.- LANGILEEI BURUZKO INFORMAZIOA

3. puntua.- Sindikatu-ordezkaritzako organoak osatzen dituzten kideak eta horretarako liberatuta dauden pertsonen kopurua, berriaz aipatu beharko delarik zer ordu-kreditu duten.

Gardentasun Kontseiluak modu positiboan baloratzen du Enpresa Batzordearen organoetako kideak eta liberatuen ehunekoa argitaratuta egotea.

4. puntua.- Lanpostuen zerrendak.

Aurreko ekitaldian Kontseilu honek gomendatu zuen —langileei buruzko informazio ahalik eta osatuena eta argigarriena izan zedin— aurrekontu-plantilla eta lanpostuen zerrenda argitaratzearekin batera dokumentu bateko eta besteko plazen eta lanpostuen arteko korrespondentziaren berri ere eman zedila, eta lanpostuen katalogoak argitara zitezela. Ildo horretatik, irizpen hau prestatzeko egindako bilkuran teknikariek jakinarazi ziguten, kontseiluko kideoi, aurrerapausoak ematen ari direla datu horiek Open Data formatuan argitaratzeko, eta oraingo enplegu-eskaintza publikoko lehiakideek Herritarren postontziaren bitartez egin dituzten kontsulta eta iradokizunak oso baliagarriak izan direla bidea urratzeko. Horrenbestez, ez dugu gomendiorik egiten horri dagokionez, teknikariek jakitera eman dizkiguten aurrerapenak aurki kontrastatu ahal izango ditugulakoan.

Desgaitasuna duten pertsonen dagokienez, gomendio bat egin zuen Kontseiluak aurreko urtean. Bertan, hain zuzen ere, iradokitzen zen argitara eman zedila, eta eguneratuta mantendu, Udalean lanean diharduten pertsona desgaituen kopuruaren eta portzentajearen inguruko informazioa, eta orobat adieraz zedila zer-nolako lan-harremana duten, nahiz eta jakin Desgaitasuna duten pertsonen eskubideei eta haien gizarteratzeari buruzko Lege Orokorren testu bategina onetsi zeneko azaroaren 29ko 1/2013 Legegintzako Errege Dekretuaren 42. artikulua³ ez dela Udalari aplikatzekoa, ezta beraren erakunde autonomoei

³42. artikulua: “Enpresa publiko nahiz pribatuetan, 50 langile edo gehiago enplegatzen badituzte, langileen arteko 100eko 2 gutxienez desgaitasunen bat duten langileak izan beharko dira.”

ere.

Bada, Udalak argitaratu ditu datu horiek, eta pozgarri gertatu zaie Kontseiluko kideei.

5.- TOKIKO POLITIKA PUBLIKOEN ETA ZERBITZU-ZORROAREN GAINKO INFORMAZIOA

Txostenean esaten denaren haritik, eta irizpen honen 8. orrian jasota utzi dugunez, positiboa iruditzen zaigu 2018ko irizpenean jasotako eskaria —zerbitzuen katalogoa lantzeko lanekin aurrera egin zedila eskatzen baikenuen— betetzeko bidean egotea.

7.- ERAKUNDE AUTONOMOAK ETA ENPRESA PUBLIKOAK

Bai Estatuko Gardentasun Legeak, bai Euskadiko Toki Erakundeei buruzko Legearen 49. artikulua udaletara eta udal enpresa publikoetara hedatzen dute gardentasun-araubidea, administrazioek entitate horietan duten partaidetza, zuzenekoa nahiz zeharkakoa, kapitalaren ehuneko 50etik gorakoa delarik.

Desgaitasunen bat duten langileei dagokienez, honako honi erreparatu dio Udalaren Gardentasun Kontseiluak:

Desgaitasuna duten pertsonen eskubideei eta haien gizarteratzeari buruzko Lege Orokorraren testu bategina onetsi zeneko azaroaren 29ko 1/2013 Legegintzako Errege Dekretuaren 42. artikuluan honela dago jaso: "*50 langile edo gehiago dituzten enpresa publiko zein pribatuak beharturik daude horien arteko 100tik 2 gutxienez desgaitasun bat duten langileak izatera*".

Arau hau aplikagarri zaie udal enpresa publikoei: AMVISA, TUVISA, Ensanche 21 Zabalgunea SA eta GILSAri. Aitzitik, ez zaio aplikagarri Udalari berari, ezta beraren erakunde autonomoei ere —Ingurugiro Gaietarako Ikastegia, Dantza Kontserbatorioa, Musika Eskola—. Langile Publikoen Oinarrizko Estatutuaren 59. artikuluan aurreikusitakoa da horiei

aplikatzekoa: “Enplegu publikoaren eskaintzetan, deialdiko lanpostu hutsen ehuneko zazpiko kupoa gordeko da desgaituek betetzeko”.

Irizpen honen 10. orrian adierazten denez, Udalak argitaratu ditu datu horiek; ez, ordea, udal enpresa publikoek eta erakunde autonomoek.

Funtsean, bi arau horien xedea berbera da, hau da, ekintza positiboko neurriak ezartzea enpresek eta, bereziki, administrazioak desgaitasunen bat duten pertsonak kontrata ditzaten, kontratatutako pertsona desgaituen portzentajea plantilletan gutxienez % 2ra irits dadin. Hortaz, oraingo honetan ere, hau gomendatzen du Kontseiluak:

- **Argitara eman dadila, eta eguneratuta mantendu, udal enpresa publikoetan eta udal erakunde autonomoetan lanean diharduten pertsona desgaituen kopuruaren eta portzentajearen inguruko informazioa, eta orobat adieraz dadila zer-nolako lan-harremana duten.**

3. BESTE ZENBAIT ALDERDI

Irizpenaren gai den txosteneko “Lege- eta arau-esparrua” atalean zehazten denez, oinarritzko bi arauk xedatzen dituzte dokumentu honetan aipatzen diren betebeharrak: alde batetik, Gardentasunari, informazio publikoa eskuratzeko bideari eta gobernu onari buruzko abenduaren 9ko 19/2013 Legean, eta bestetik, berriz, Euskadiko Toki Erakundeei buruzko apirilaren 7ko 2/2016 Legean, beste lege-arau batzuk gorabehera.

Beraz, puntu honetan, Udalaren Gardentasun Kontseiluak komenigarri deritzo beste arau-testu batzuetatik sortzen diren betebeharrak gogora ekartzeari, hala nola Administrazio Publikoen Administrazio Prozedura Erkidearen urriaren 1eko 39/2015 Legetik edo Sektore Publikoko Kontratuei buruzko azaroaren 8ko 9/2017 Legetik.

Kontratazio publikoaren arloko legedia

Honela dago jasota Sektore Publikoko Kontratuei buruzko azaroaren 8ko 9/2017 Legearen 28.4 artikuluan: “Sektore publikoko erakundeek kontratazio publikoaren jarduera programatuko dute eta aurrekontu-ekitaldi batean edo urte anitzeko aldietan garatuko, eta

kontratazioari buruzko beren plana aurrez jakinaraziko dute, aurretiazko informazioaren iragarki baten bitartez; iragarki horretan, zeina 134. artikuluan aurreikusita baitago, gutxienez ere erregulazio harmonizatuko kontratuak agertuko dira.”

Bestalde, Sektore Publikoko Kontratuei buruzko azaroaren 8ko 9/2017 Legearen 63.3 artikulua, *in fine*, honela dio: *“Halaber, kontratatzailearen profilean argitaratu beharko dira: kontratua ez adjudikatzeko edo ez egiteko erabakia; adjudikazio-prozeduran atzera egitea; prozedura hutsik deklaratzeta, bai eta errekurtsoen aurkezpena eta kontratuen behin-behineko etetea ere, errekurtsok aurkeztearen ondoriozkoa.”*

Hori dela eta, Gardentasun Kontseiluko kideek gomendio egiten diogu Gasteizko Udalari kontratazio publikoaren arloko legedian ezarritako gardentasunaren inguruko betebeharrak bete ditzala:

- **Urteko Kontratazio Plana argitara dadila.**
- **Kontratatzailearen profilean gehitu dadila errekurtsok aurkezteko aukeraren inguruko informazioa, baita errekurtsok aurkeztearen ondorioz kontratuak etetearen ingurukoa ere.**

Administrazio-prozeduraren arloko legedia

39/2015 Legearen 21.4 artikuluan honela dago jasota: *“Administrazio publikoek argitaratu eta eguneratuta eduki behar dituzte webgunean, jendearen informaziorako, beren eskumeneko prozeduren zerrendak, haien gehieneko iraupenak eta administrazio-isiltasunaren ondorioak adierazirik.”* Udalaren Gardentasun Kontseilua jakitun da zer-nolako zailtasunak dakartzan zeregin horrek berekin, baina, nolana ere, uste du garrantzitsua dela informazio hori Udalaren webgunean argitaratzea. Horregatik, gomendio hau egiten dio Gasteizko Udalari:

- **Udalaren webgunean argitara dadila beraren eskumeneko prozeduren zerrenda, orobat adierazten direlarik horien gehieneko iraunaldiak, baita administrazioaren isiltasunak izango lituzkeen ondorioak ere.**

Udalaren webgunean bada izapideei buruzko atal bat, non eskabide mota bakoitzeko formulario edo eredu bana eskaintzen den, eta izapideak egingo dituen atalari buruzko informazioa ematen, baina ez da azaltzen bakoitzaren bitartez abian jartzen den prozedura, ezta ere ebazteko epeak adierazten eta legez eman beharreko informazioa ematen. Udalaren Gardentasun Kontseilua ohartu da eredu horietako askotan izaera pertsonaleko datuak babestearen inguruko lege-oharrak ez daudela indarrean dagoen legedira moldatuta, eta, horrenbestez, honako hau ere gomendatzen du irizpen honetan:

- **Udalaren webgunean ageri den informazioa izaera pertsonaleko datuak babestearen arloko legedira moldatu dadila.**

INFORMAZIO PUBLIKORAKO SARBIDEA

Gasteizko Udalean ahaleginak egin dira berariazko administrazio-prozedura bat gaitzeko, herritarrek legez aitortua zaien eskubidea baliatzerik izan dezaten. Era berean, argitaratuta daude Udalaren datu estatistikoak, eskabideen, onartu ez direnen, erantzuteko epeen eta besteren inguruan.

Gardentasun Kontseiluak modu positiboan baloratzen ditu burutu diren lanak, baina, hala eta guztiz ere, komenigarritzat jotzen da proposamen sorta bat planteatzea, arlo horretan gardentasuna hobetzen lagunduko bailuke horrek:

- **Udal enpresa publikoei nahiz erakunde autonomoei informazio publikorako sarbidea izateko egiten zaizkien eskabideak onartzen ez edo ukatzen direneko ebazpenak argitara eman daitezela.**
- **Euskadiko Gardentasun Batzordearen ebazpenak argitara eman daitezela, Udalari, udal enpresa publikoei nahiz erakunde autonomoei informazio publikorako sarbidea izateko egindako eskabideei uko egin izanaren ondorioz aurkeztutako erreklamazioei dagozkienean.**